



Fidoyilik —
Vatanga xizmat demak!

2023-yil 14-dekabr, payshanba,
148 (23.869)-son

**KUN
HIKMATI**

Xokorlik,
kamtarlik olim
ulug'ligining
birinchi
belgisidir

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz



SAMARQAND va SHANDUN:

HAMKORLIK YANGI BOSQICHDA DAVOM ETADI

Xitoy Xalq Respublikasida bo'lib turgan viloyat hokimi E. Turdimov boshchiligidagi delegatsiya ushbu mamlakat mintaqalari rahbarlari va tadbirkorlar bilan uchrashuvlar o'tkazmoqda.

Viloyatimiz vakillarining navbatdagi tadbirlari Shandun provinsiyasida bo'lib o'tdi.

E. Turdimov Xitoy kommunistik partiyasi Shandun provinsiyasi partiya qo'mitasi kotibi Lin U bilan uchrashdi. Muloqot chog'ida joriy yilning sentabr oyida Samarqandda o'tkazilgan uchrashuvda erishilgan kelishuvlarni amalga oshirish va ayni tashrif davomida mintaqalar o'rtasidagi savdo-iqtisodiy aloqalarni kengaytirish muhimligi ta'kidlandi.

Viloyatimiz hokimi, shuningdek, Lyu Syan boshchiligidagi Szinan shahri rahbariyati bilan uchrashuvda yuksak mehmondorlik va samimiy qabul uchun mezbonlarga minnatdorlik bildirdi. O'zbekiston, xususan,

Samarqand bilan uzoq tarixiy aloqalari mavjud Shandun provinsiyasi bilan hamkorlik ikki tomon uchun manfaatli bo'lishini qayd etdi.

Uchrashuvda tomonlar Samarqand viloyati hokimi boshchiligidagi rahbarlar va tadbirkorlarning Xitoyga bugalgi tashrifi mintaqalar o'rtasidagi aloqalarda yangi sahifa ochishi va hamkorlik istiqbollari xizmat qilishini ta'kidladilar.

Shundan so'ng viloyatimiz va Shandun provinsiyasi tadbirkorlari ishtirokida biznes-forum o'tkazildi.

Forum ishida qatnashgan viloyat hokimi Erkinjon Turdimov ishtirokchilarga Samarqandning investitsion jozibadorligi haqida so'zlab berdi. Shuningdek, shandunlik tadbirkorlar-

ni Samarqandda investitsiya kiritgan holda o'z bizneslarini olib borishga taklif qildi.

Biznes-forumda mamlakatimizning Xitoydagi Favqulodda va muxtor elchisi Farhod Arziyev ishtirok etdi va so'zga chiqdi.

Shandundagi tadbirlar davomida viloyatimiz hokimi bir qator yirik kompaniyalar rahbarlari va tadbirkorlar bilan uchrashuvlar o'tkazdi.

Jumladan, "Shandong Heavy Industry Group" kompaniyasi rahbari Lyu Vey bilan muloqot chog'ida Erkinjon Turdimov bugungi kunda mamlakatimizda qurilish va qishloq xo'jaligi sohalari jadal rivojlanayotganini ta'kidlab, ushbu yo'nalishlarda hamkorlik tomonlar uchun manfaatli bo'lishini qayd etdi.

**Viloyat hokimligi
axborot xizmati.**

OBOD XONADON — OBOD KO'CHA — OBOD MAHALLA

Xayrli tashabbus mamlakat bo'ylab qanot yozmoqda



Davlatimiz rahbarining topshirig'iga asosan, Prezident Administratsiyasi, Xalq qabulxonalarini, mutasaddi vazirlik va idoralar vakillaridan tashkil topgan respublika ishchi guruhi viloyat hokimligi, sektorlar rahbarlari hamda Kattaqo'rg'on, Ishtixon, Oqdaryo, Past Darg'om, Narpay tumanlari hokimliklari, mutasaddi tashkilotlar bilan birgalikda shu yilning sentabr-noyabr oylarida ushbu tumanlardagi ijtimoiy-iqtisodiy holati og'ir bo'lgan 5 ta mahallada "Obod xonadon", "Obod ko'cha", "Obod mahalla" mezonlarini joriy etish bo'yicha keng ko'lamli bunyodkorlik va obodonlashtirish ishlarini amalga oshirdi.

Joylardagi o'rganishlar va mahalliy hokimliklar taklifi asosida Kattaqo'rg'on tumanidagi Cho'yanchi, Ishtixonidagi Chag'atoy, Past Darg'omdagi Olti qahramon, Oqdaryodagi Yangiqo'rg'on va Narpaydagi Salovat mahallalarini obod qilish, aholi uchun qulay turmush sharoiti yaratish va hayotini o'zgartirish belgilangandi. Dastlab har bir mahallada amalga oshirilishi lozim bo'lgan ishlarining yo'l xaritalari tuzib olindi. Xonadonbay o'rganish asosida qaysi oilaga qanday yordam ko'rsatilsa, ularning hayoti o'zgarishi belgilandi. Shu asosida uch oy ichida beshta mahalladagi 1995 ta xonadonda "Obod xonadon" mezonlari joriy etildi. Jumladan, 169 ta kam ta'minlangan oila xonadonlari homiylik hisobidan joriy va kapital ta'mirlandi.

Aholi turmush darajasini oshirishning asosiy omili bandlik, doimiy daromad manbaiga ega bo'lish hisoblanadi. Shundan kelib chiqib, mahallalardagi 611 nafar fuqaroning bandligi ta'minlandi, 40 nafariga 253 million so'm miqdorida subsidiya, 124 nafariga 2 milliard 263 million so'm miqdorida kredit ajratilishiga ko'maklashildi, ijtimoiy himoyaga muhtoj 293 nafar fuqaroga 631 million so'm miqdorida moddiy yordam ko'rsatildi.

Uch oy davomida besh mahallada ham viloyatdagi tibbiyot muassasalarining malakali mutaxassislaridan iborat guruhlar tomonidan tibbiy ko'riklar uyushtirildi. Bu tadbirlar davomida 21 mingdan ortiq aholi chuqurlashtirilgan tibbiy ko'rikdan o'tkazildi va ko'rik xulosalari asosida 261 nafar fuqaroni davolash choralarini ko'rdi, 1638 nafariga bepul dori-darmon va 31 nafariga reabilitatsiya vositalari berildi.

Mahallalarda yangi tizimni joriy etish



(Davomi 2-sahifada) >>>

BILIM UCHUN 100 MILLION SO'M

Yoshlar ishlari agentligi tomonidan o'tkaziladigan "Bilim uchun 100 million" olimpiadasining bu yilgi mavsumi onlayn bosqichida 120 ming o'zbekistonlik ishtirok etdi.

Onlayn bosqichda eng yuqori o'rinni qayd etgan TOP-100 ishtirokchi o'rtasida olimpiadaning ikkinchi final bosqichi o'tkazildi.

Finalda kattaqo'rg'onlik 21 yoshli Jahongir To'rayev eng yuqori ball bilan birinchi o'rinni qo'lga kiritdi va 100 million so'm pul mukofoti bilan taqdirlandi.

Jahongir To'rayev 2002-yilda Kattaqo'rg'on shahrida tug'ilgan. 2019-2023-yillarda Mirzo Ulug'bek nomidagi O'zbekiston Milliy universitetida tahsil olgan. O'ndan ziyod xalqaro matematika olimpiadalari sovrindori va qator nomdor stipendiyalar sohibi bo'lgan.

- 2019-yilning iyul oyida Buyuk Britaniyada bo'lib o'tgan IMO (International Mathematics Olympiad) xalqaro matematika olimpiadasida masalalarni nostandart usulda ishlaganim uchun maxsus diplom (Honorable Mention) bilan taqdirlanganman, - deydi Jahongir To'rayev. - Bu mening xalqaro olimpia-



dadagi ilk katta yutug'im edi. Shundan keyin 2020-yil Bolgariyada universitet talabalari o'rtasida o'tkazilgan onlayn IMC (International Mathematics Competition for university students) XXVII xalqaro matematika musobaqasida kumush medal, 2022-yilda esa ushbu olimpiadada O'zbekiston terma jamoasi safida yagona oltin medalni qo'lga kiritdim.

F.RO'ZIBOYEV.

2021-yil Turkmaniston Respublikasida "4th Open Mathematical Olympiad for University Students" olimpiadasida yakka tartibda ishtirokchi uchun kumush va jamoaviyda bronza medalini, Rossiyaning Sankt-Peterburg shahridagi Sankt-Peterburg axborot texnologiyalari, mexanika va optika milliy tadqiqot universiteti (ITMO University) tomonidan o'tkazilgan yettinchi xalqaro "NCUMC" olimpiadasida ikkinchi o'rinni egallaganman.

Bundan tashqari, Jahongir akademik T.A. Sarimsoqov nomidagi, akademik Qori Niyoziy nomidagi stipendiyalar sovrindori, "Asakabank" AJ tomonidan tashkil etilgan "Yosh matematik" stipendiyasi hamda Mirzo Ulug'bek nomidagi davlat stipendiyasi g'olibi bo'lgan.

- O'tgan yili Yoshlar ishlari agentligi tomonidan ilk marta tashkil etilgan "Bilim uchun 100 million" olimpiadasida mutlaq g'oliblikni qo'lga kiritgan edim, - deydi Jahongir To'rayev. - Bu yilgi olimpiada finalida ham reytingi baland 100 nafar ishtirokchi bilan raqobatlashish oson bo'lmadi. Shunga qaramay, mantiq va tafakkurga asoslangan 50 ta savolning barchasiga to'g'ri javob berib, olimpiadada yana g'alaba qozondim.



**OBUNA —
2024**

**Orif PARDAYEV,
jinoyat ishlari
bo'yicha
Samarqand
shahar sudi raisi.**

- Men
"Zarafshon"
gazetasiga
obuna bo'ldim.

SIZCHI?

**Obuna
bahosi
O'TGAN
YILGI
NARXDA!**

Yurtimiz tibbiyot sohasiga zamonaviy texnologiyalarning joriy etilishi va samarali tashxislash-davolash usullarining yo'lga qo'yilishi shu paytgacha xorijda bajarilgan yoki davolash imkoniyati bo'lmagan xastalıklar bo'yicha jarrohlik amaliyotlarini o'zimizda bajarishga sharoit yaratdi.

Bu borada Samarqand davlat tibbiyot universitetining ko'p tarmoqli klinikasida ham muayyan natijalarga erishilmoqda.

Ma'lumotlarga ko'ra, hozirgi kunda epilepsiyani davolashda qo'llanilayotgan antikonvulsant (antiepileptik) preparatlar 80-85 foiz holatda samara beradi. Qolgan 15-20 foiz bemorlarda ushbu vositalarni qabul qilgan ham epileptik xurujlar davom etaveradi va epileptik xurujlarni to'xtatish yoki kamaytirish imkoniyati bo'lmaydi.

Bu holat tibbiyotda farmakorezistent epilepsiya, deyiladi va bunday bemorlarda xirurgik yo'l bilan davolanish talab etiladi. Ushbu yo'nalishdagi faoliyatni takomillashtirish maqsadida universitet neyroxirurgiya va neyroreabilitatsiya ixtisoslashtirilgan ilmiy-amaliy markazi professor-o'qituvchilari va klinikamiz neyroxirurgiya bo'limi vrachlari Rossiya Federatsiyasining Tyumen shahridagi Federal neyroxirurgiya markazi, shuningdek, Turkiyaning Istanbul va Izmir shaharlaridagi yetakchi neyroxirurgik klinikalarda gipofiz adenomalari va farmakorezistent epilepsiyani endoneyroxirurgik usulda bartaraf etish bo'yicha malaka oshirib keldi. Shu bilan birga, mazkur yuqori texnologiyali neyroxirurgik amaliyotlarini bajarish uchun neyroxirurgiya bo'limi zamonaviy neyroendoskopik uskuna va elektron-optik konvertor



TUTQANOQNI JARROHLIK YO'LI BILAN DAVOLASH YO'LGA QO'YILDI

C-arm (EOP) bilan qo'shimcha jihozlandi. Natijada klinikada ilk bor gipofiz adenomalari neyroendoskopik usulda transnazal transfenoidal olish operatsiyasi amaliyotga joriy etildi.

Hozirgi kunga qadar 25 nafar bemorda mazkur neyroendoskopik amaliyotlar bajarildi. Bemorlar ko'rishning pasayishi, ortiqcha vazn, akromegaliya, ko'krakdan sut ajralishi, qandsiz diabet, qon bosimida nostabillik kabi shikoyatlar bilan murojaat qilgan. Operatsiyadan keyin ularning barchasida ko'rish faoliyati yaxshilangan, endokrinologik buzilishlar barqarorlashgach, umumiy ahvoli yaxshilangan.

Misol uchun, A. ismli 11 yoshli hamda S. ismli 23 yoshli bemor bir kunda 7-8-martagacha tutqanoq xurujlari kuzatilishi, tutqanoq qo'shni dorilarni yuqori dozada qabul qilsa ham samarasi bo'lmaganligi shikoyati bilan klinikaga murojaat qilgan.

11-noyabr kuni bemorlarda yuqori texnologiyali neyroendoskopik gorizontaal gemisferotomiya operatsiyasi o'tkazildi. Jarrohlik amaliyotidan so'ng ikkala bemorda ham nevrologik defitsitlar, nutq va harakat buzilishi kuzatilmadi, muhimi, tutqanoq xurujlari qayd etilmadi.

Jahon sog'liqni saqlash tashkiloti ma'lumotlariga ko'ra, hozir-

gi vaqtda dunyo aholisining 80 foizidan ortig'ida hayotining turli davrlarida bel-dumg'aza umurtqalararo disk churrasi kuzatiladi. Buning asosiy qismini mehnatga layoqatli yoshdagi bemorlar tashkil qiladi. Shu sababli umurtqalararo disk churrasini davolashning eng samarali usulini izlash dolzarb hisoblanadi.

Shimoliy Amerika spinal xirurglar assotsiatsiyasi klassifikatsiyasiga ko'ra, bel-dumg'aza umurtqalararo disk churralarida bajariladigan jarrohlik amaliyotining uchta zamonaviy usuli mavjud. Bular - mikroxiirurgik, mikroendoskopik va endoskopik. Umurtqalararo disk churrasining joylashgan joyi, migratsiyalanganligini (kranial yoki kaudal), konsistensiyasi (kalsifikatlanganligini) hisobga olib, jarrohlik amaliyotini qo'llashda yuqorida sanab o'tilgan zamonaviy jarrohlik usullaridan biri tanlanadi.

Bel umurtqalararo disk churralarini mikroxiirurgik usulda olish, disk churralarini jarrohlik yo'li bilan davolashning "oltin standarti" hisoblanadi. Neyroxirurgiya bo'limida bel-dumg'aza umurtqalararo disk churralarini tubusli retractor yordamida mikroskopik olish operatsiyasi ham yo'lga qo'yildi. Bu usul orqali jarrohlik amaliyoti bajarilgan bemorlarning klinikada davolanish muddati 8-10 kundan 3-4 kungacha qisqardi, operatsiya vaqtida teri kesmasi 10-12 santimetrdan 2-2,5 santimetrgacha kamayadi, paravertebral mushaklar butunligi saqlab qolinadi, operatsiya vaqtida qon yo'qotilishi minimallashadi, bemorda o'tkaziladigan reabilitatsiya muddati qisqardi. Eng asosiysi, bemorning mehnat faoliyati qisqa muddat, o'rtacha bir oyda tiklanadi. Keyingi ikki oy davomida klinikamizda ushbu usulda 20 dan ortiq jarrohlik amaliyotlari muvaffaqiyatli bajarildi.

Nargiza ABDULLAYEVA, Samarqand davlat tibbiyot universiteti davolash ishlari bo'yicha prorektor, universitet ko'p tarmoqli klinikasi bosh shifokori.



BARAKA HARAKATDA, MEHNATDA

Intilishi kuchli insonning tadbirkor bo'lishi oson. Ammo ishini boshlagandan keyin haqiqiy ishbilarmon bo'lib qolish nihoyatda qiyin. Yangi boshlangan har bir ishda dastlab kutilmagan to'siqlar yuzaga keladi. Bularning bariga bardosh berolgan tadbirkor o'z ishini rivojlantira oladi.

Urgut tumanining Yangiobod mahallasida kasanachilik faoliyatini yo'lga qo'ygan Mehriqul Burxonova hozirda 70 dan ortiq hamqishlog'ining daromad topishda ko'makchi bo'lyapti. Xonadonida tashkil qilgan "Mehriqul tekstil" MCHJda bugun 20 ta doimiy ish o'rni yaratilgan. Yana 50 ta xonadonda kasanachilik asosida chopondozlik yo'lga qo'yilgan.

Chopondozlikni onamdan o'rganganman, - deydi Mehriqul opa. - Bir kun kelib, bu hunar ortidan daromad topaman, deb hech o'ylamagan dim. Hunarimdan xabardor bo'lgan qo'ni-qo'shnilarim chopon tikib berishimni so'rab kelishar edi. Shu kabi goh-gohida keladigan buyurtmalarni qilib, qo'l mehnati haqini olar edim. Ishimni boshqalar ham ko'rib, buyurtmalar ko'paydi. Ro'zg'or ishlaridan bo'sh vaqtimda bajarayotgan ishimdan daromad topa boshlaganim meni ruhlantirdi. Dastlab choponlarni tumandagi bozorga sotishdan boshladim, asosiy ko'makchilarim oilam edi.

Ro'zg'orga qut-baraka, xonadonga farovonlik o'z-o'zidan kelmaydi. "Olma pish, og'zimga tush" qabilida yashash-

ga o'rgangan odamlarni boqimandalik kayfiyati yengib oladi. Mehriqul opa mahallada hokim yordamchisi bilan bamaslahat faoliyatini kengaytirishga kirishdi.

Aval qo'l mehnati ko'proq edi, - deydi hunarmand. - 2022-yil yanvar oyida hokim yordamchisi ko'magi bilan Xalq bankidan 220 million so'm kredit olib, Xitoydan dastgoh olib keldik. Endi ishimizning unumi oshgan. Kuniga 500 tagacha chopon tikyapmiz. Bugun tikuv seximizning o'zida 20 nafardan ortiq xotin-qiz ish bilan band. Hozir asosan Surxondaryo viloyatiga chopon yetkazib beryapmiz. Kelgusida yangi ish o'rinlari yaratish maqsadida kasanachilik asosida mahalladoshlarimizning bandligini ta'minlashni rejalashtirganman. Bunda asosan uyda ishsiz o'tirgan, ijtimoiy daftarlardagi xotin-qizlarga ko'mak berishni niyat qilypman.

Baraka harakatda, mehnatda. Mehnatdan, izlanishdan qochmagan odam, albatta, maqsadiga erishadi. Intilganga tole yor. Insonning mehnati, so'zi halol bo'lsa, uni barcha qo'llab-quvvatlaydi.

S.MARDIYEV.

OBOD XONADON - OBOD KO'CHA - OBOD MAHALLA

Xayrli tashabbus mamlakat bo'ylab qanot yozmoqda

(Davomi. Boshlanishi 1-sahifada).

Mazkur haftalik davomida besh mahallada respublika ishchi guruhi va viloyat mas'ullari, keng xalq ommasi ishtirokida bayram tadbirlari o'tkazildi, yangi bino va inshootlar foydalanishga topshirildi. Jumladan, Chag'atoyda 15 ta, Cho'yanchida 11 ta, Yangi qo'rg'onda 10 ta, Olti qahramonda 7 ta va Salovat mahallasida 4 ta yangi obyekt - mahalla binolari, xotin-qizlar bandligini ta'minlash va salomatligini mustahkamlash markazlari, aholiga xizmat ko'rsatish majmualari, oilaviy shifokorlik punktlari, aholi dam olish maskanlari va kutubxonalar, maktabgacha ta'lim tashkilotlari va xotin-qizlarni kasb-hunarga o'rgatish maskanlari ochildi.

Mahallalardagi bayram tadbirlari davomida "Obod xonadon", "Obod ko'cha" va "Obod mahalla" mezonlarini joriy etish bo'yicha keng qamrovli ishlarda faol qatnashgan davlat va jamoat tashkilotlari xodimlari, aholi vakillariga "Mehnat faxriysi", "Sog'liqni saqlash lo'chisi", "Mahalla iftixori", "Xalq ta'limi fidoyisi", "A'lo xizmatlari uchun", "Oila va xotin qizlar qo'mitasining eng faol ayoli" nishonlari berildi. "Obod xonadon" va "Obod ko'cha" ko'rik-tanlovlarining 30 nafar g'olblari esa pul mukofotlari va esdalik sovg'alari bilan taqdirlandi.



Bir so'z bilan aytganda, uch oy davomida viloyatdagi besh mahalla misolida yurtimizda inson qadri-ni ulug'lash, aholi uchun munosib turmush sharoiti yaratish bugun davlatimiz ijtimoiy siyosatining asosini tashkil etishi yana bir bor namoyon bo'ldi. E'tiborlisi, bu ishlar ertaga boshqa mahallalarda davom etadi va butun mamlakatimiz obodlik sari yuz tutadi.

Mamatjon TURDIYEV, O'zbekiston Respublikasi Prezidentining viloyatdagi Xalq qabulxonasi mudiri.



HUQUQIY MASLAHAT

ER-XOTINNING UMUMIY MULKI QANDAY TAQSIMLANADI?

- Bu uyda mening ham haqim bor.
- Uni o'g'limga o'zimga qurganman, ajrashishni xohlayapsanmi, endi bu uyda senga joy yo'q.
- Ho, hali shunaqami, ko'rsatib qo'yaman!...
Bunga o'xshash nizolarga keyingi yillarda tez-tez guvoh bo'lib turibmiz. Ma'lumotlarga ko'ra, ko'p holatda ajrimlar ortidan er va xotin o'rtasidagi mulkiy nizolar yuzaga keladi. Aksariyat hollarda odamlar bu masalaga ko'pam e'tibor qaratmaydilar. Ammo ularning shu qadar nozik chiziqchiligi borki, buni bilmaslik gohida "g'olib" tarafga "qimmat"ga tushishi mumkin.
Ushbu maqolada fuqarolik ishlari bo'yicha Samarqand shahar tumanlararo sudi sudyasi Furqat Anorov er-xotinning umumiy va har birining alohida mulki, umumiy mulkni tasarruf etish, bo'lish va undagi ulushlarni aniqlash xususida so'z yuritadi.
- Nikoh davomida olingan mol-mulk er va xotinning umumiy mulki hisoblanadi, - deydi F.Anorov. - Xususan, bunday mulk sirasiga quyidagilar kiradi:
- mehnat va tadbirkorlik faoliyatidan, shuningdek, intellektual faoliyat natijalaridan ortirilgan daromadlar;
- pensiya, nafaqa, shuningdek, moddiy yordam va kompensatsiya summalari (masalan, moddiy yordam, mayib bo'lish yoki salomatligiga yetgan zarar uchun to'langan summa va boshqalar) kiradi.

MULK ER YOKI XOTINDAN BIRINING NOMIDA ...

Er-xotinning umumiy puliga olingan ko'char va ko'chmas ashyolar, qimmatbaho qog'ozlar, paylar (aksiyalar), omonatlar, kredit muassasalariga yoki boshqa tijorat tashkilotlariga kiritilgan kapitaldagi ulushlari hamda boshqa har qanday mol-mulkleri er-xotinning umumiy mulki hisoblanadi.
Ushbu mol-mulkleri er yoki xotindan qaysi birining nomiga rasmiylashtirilgan, puli er va xotinning qaysi biri tomonidan to'langan bo'lishidan qat'i nazar, umumiy mol-mulk hisoblanadi (masalan, uy-joy, mashina, omonatlar).

NIKOHDAN OLDIN OLINGAN MULK-CHI?

Bunday holatda, ya'ni nikoh qayd etilgunga qadar bo'lajak er-xotinning umumiy pullariga olingan buyumlar ham umumiy mulk sanaladi. Lekin nizo chiqqan taqdirda bunday mol-mulk birgalikda olinganligini isbotlash kerak bo'ladi. Isbot sifatida to'lov kvitansiyalari, cheklar, bank tranzaksiyalari va boshqalarni ko'rsatish mumkin.

ENG NOZIK NUQTA

Ayrim hollarda nikohdan so'ng ayol ishlamaydi, uy ishlari va bola parvarishi bilan band bo'ladi. Qonunchilikka ko'ra, er-xotindan biri uy-ro'zg'or ishlari, bolalarni parvarish qilish bilan band bo'lgan yoki boshqa uzrli sabablarga ko'ra mustaqil ish haqi va boshqa daromadga ega bo'lmagan taqdirda ham er va xotin umumiy mol-mulka nisbatan teng huquqqa ega bo'ladi.
Ta'kidlash lozim, umumiy mulkka nisbatan er va xotin teng huquqli. Umumiy mulkni sotish, bironing foydalanishga berish, sovg'a qilish yoki boshqacha ko'rinishda foydalanish uchun ularning har ikkalasining roziligi kerak bo'ladi.
Masalan, er nomiga rasmiylashtirilgan uy-joyi sotishda xotindan notarial tasdiqlangan rozilik olishi lozim. Agar bunday roziliksiz uy-joyi sotilsa, xotinning arizasi bilan sud tomonidan bu oldi-sotdi shartnomasi bekor qilinadi. Bunda xotin shartnoma tuzilganligini bilmaganligi yoki tuzishga qarshi bo'lganligini isbotlab berishi kerak.
Biroq shuni yodda tutish kerakki, bunday ariza xotin uy sotilganligini bilgan yoki bilishi kerak bo'lgan kundan boshlab bir yil davomida berilishi kerak.

QANDAY TAQSIMLANADI YOKI BO'LINADI?

Umumiy mulk istalgan paytda: er va xotindan birining talabi bilan nikohdan ajrashmasdan ham, ajrashgandan keyin ham bo'linishi mumkin. Shuningdek, er yoki xotinning qarzini undirish umumiy mulkka qaratilganda ham mulk bo'linishi mumkin.
Umumiy mulk o'zaro kelishuvga ko'ra bo'linadi. Agar er va xotin kelisha olmasa, bu vazifa sudga qoladi. Sud er va xotinning har biriga mulkning qaysi qismi berilishi lozimligini aniqlaydi. Er (xotin)ga uning ulushidan oshiq qiymatga ega bo'lgan mol-mulk beriladigan hollarda, xotin (er)ga tegishli pul yoki o'zga kompensatsiya belgilanishi mumkin.
Bolalarning ehtiyoji uchun olingan buyumlar (masalan, kiyim-bosh, poyabzal, maktab va sport jihozlari, musiqa asboblari, bolalar kutubxonasi va boshqalar) bo'linmaydi hamda bolalar er va xotindan qaysi biri bilan yashasa, unga kompensatsiyasiz beriladi. Shuningdek, bolalarning nomiga qo'yilgan omonatlar o'sha bolalarga tegishli hisoblanadi va bo'linmaydi.
Nikohdan ajralgandan keyin umumiy mulkni bo'lish to'g'risidagi ariza uch yil davomida berilishi mumkin.

ULUSHLAR QANDAY ANIQLANADI?

Agar er va xotin nikoh shartnomasida boshqacha kelishmagan bo'lsa, ulushlar teng hisoblanadi.
Ammo sud bolalar manfaatidan va (yoki) er va xotindan birining e'tiborga loyiq manfaatini hisobga olib, jumladan, agar er yoki xotin uzrsiz sabablarga ko'ra ishlamagan, daromad olmagan bo'lsa yoki umumiy mulkni oila manfaatlariga zarar yetkazgan holda sarflagan bo'lsa, teng taqsimlanmasligi mumkin.
Mulkni bo'lishda er va xotinning umumiy qarzi ham ular olayotgan ulushga mos hajmda taqsimlanadi.
Agar er va xotindan biri umumiy mulkni ikkinchi tomonning roziligisiz va oila manfaatiga mos bo'lmagan holda o'z xohishiga ko'ra sarflagan yoki boshqa shaxsga o'tkazgan bo'lsa, uni bo'lishda bu mol-mulk yoki uning qiymati hisobga olinadi.

ALOUIDA MULKKA NIMALAR KIRADI?

Er va xotinning nikohgacha o'zini bo'lgan mulki, shuningdek, ulardan har birining nikoh davomida hadya, meros tariqasida yoki boshqa bepul bitimlar bilan olgan mol-mulki ularning alohida mulki hisoblanadi.
Biroq bu yerda masalaning yana bir nozik tomoni bor. Masalan, urning nikohgacha bo'lgan paytda olgan uyi bor. Nikohdan keyin xotin bu uyni qaytadan qurishi, kapital ta'mirlashi yoki qayta jizohlashi natijasida qiymati ancha oshdi. Shunday holatda bu uy umumiy mulk deb topilishi mumkin.
Shuni ham aytish kerakki, qimmatbaho buyumlar va zebu ziynatlardan boshqa shaxsiy foydalanishdagi buyumlar (kiyim-bosh, poyabzal va boshqa shu kabilar) nikoh davomida er va xotinning umumiy puliga olingan bo'lsa ham, ulardan foydalanib kelgan er va xotinning xususiy mulki hisoblanadi.

XULOSA O'RNIDA

Tabiiy savol tug'ilishi mumkin, nikoh davomida va undan keyin paydo bo'lishi mumkin bo'lgan mulkiy nizolarning oldini olish uchun nima qilish kerak? Er va xotin o'rtasidagi mulkiy huquq va majburiyatlarini nikoh shartnomasida belgilab olish lozim. Albatta, hech kim "kun kelib, ajrashib ketaman" degan yomon niyat bilan oila qurmaydi. Biroq reallik doim ham hislar bilan ishlashni bilmashtirmaydi. Nikoh shartnomasi esa kelgusida vujudga kelishi mumkin bo'lgan har qanday kelishmovchilik va noaniqliklarning oldini oladi.

Y.MARQAYEV yozib oldi.

Favqulodda vaziyat — bu muayyan hududda o'zidan so'ng odamlarning qurbon bo'lishi, odamlar sog'lig'i yoki atrof-muhitga ziyon yetkazishi, kishilarning hayot faoliyatiga kattagina moddiy zarar hamda uning buzilishiga olib kelishi mumkin bo'lgan yoki olib kelgan avariya, halokat, stixiyali ofat, epidemiyalar, epizootiyalar natijasida yuzaga kelgan holatdir.

OYLIK QANDAY O'TDI?

monidan o'zi o'chirishga urinish yoki noto'g'ri manzilga xabar qilish natijasida ham bunday holatlar kuzatiladi.

- Keyingi paytda o'zini favqulodda vaziyatlar vazirligi xodimi sifatida tanishtirib, qandaydir xizmati uchun fuqarolardan pul olayotgan firibgarlar uchramoqda. Viloyatda shu kabi holatlar kuzatildimi va bunday holatlarda nima qilish kerak?

- Kuz-qish mavsumida aholi orasida, ayniqsa, tumanlarda maxsus kiyim-bosh kiyib yurgan yoki shu kiyimga juda o'xshash libos kiygan shaxslar o'zlarini "davlat yong'in nazorati organi xodimi" sifatida tanishtirib, fuqarolardan noqonuniy pul yig'ish holatlari kuzatilmoqda.

Bu harakatlar asosan nomida "yong'in", "olov", "qarshi kurash", "xavfsizlik", "himoya" kabi so'zlar bo'lgan va yong'inning oldini olish aks etgan turli xil ramzlar tushirilgan muhramlardan foydalanib kelayotgan tadbirkorlik subyektlari tomonidan amalga oshirilayotgan ma'lum bo'lgan.

Shuni eslatib o'tish kerak, yong'in va uning oldini olish bilan bog'liq biron bir to'lov qonunchilikda mavjud emas. Agar shunday holatlar kuzatilsa, huquqni muhofaza qiluvchi organlarga murojaat qilish lozim.

Ma'muriy javobgarlik to'g'risidagi kodeksning 209-ne-moddasiga ko'ra, formal kiyim-bosh kiyib yurishi nazarda tutilgan vazirliklar, idoralar va tashkilotlar harbiy xizmatchilari hamda xodimlarining tasdiqlangan namunadagi harbiy, idoraviy va maxsus formal kiyim-boshini bunday huquqqa ega bo'lmagan shaxslar tomonidan kiyib yurish uchun javobgarlik belgilangan.

- 15-noyabrdan 15-dekabrqa qadar respublikamizda "Yong'in xavfsizligi oyligi" e'lon qilindi. Bu borada viloyat favqulodda vaziyatlar boshqarmasi va tashkilotlar tomonidan qanday ishlar amalga oshirilmog'ida?

- Viloyatda favqulodda ho-

latlarning oldini olish va fuqarolarning xavfsizligini ta'minlash maqsadida haftaning chorshanba va shanba kunlari profilaktik tadbirlar o'tkazilmoqda. Shuningdek, kuz-qish mavsumini betalafot o'tkazish, yong'inlar va is gazi bilan bog'liq holatlarning oldini olish maqsadida "Yong'in xavfsizligi oyligi" doirasida viloyatning barcha shahar va tumanlarida profilaktik tadbirlar olib borilib, tegishli idora va tashkilotlardan 780 nafar vakil jalb etilgan.

Jumladan, oylik doirasida viloyat hududidagi 974 ta davlat tasarrufidagi hamda 265 ta tadbirkorlik subyektlariga tegishli obyektlarda, 519 ta davlat va 213 ta yangi qurilish obyektlarida belgilangan tartibda tekshiruvlar hamda profilaktik tadbirlar o'tkazildi. Natijada yong'in xavfsizligini ta'minlash borasida 13 ming 520 ta kamchilik yuzasidan obyekt rahbarlariga yozma ko'rsatmalar berildi.

Shuningdek, mahallalar, korxonalar va tashkilotlar, tadbirkorlik subyektlariga qarashli obyektlar, maktabgacha ta'lim muassasalari hamda davolash muassasalari shifokorlar hamda ishchi-xizmatkchilar bilan birgalikda is gazidan zaharlanish, havo-gaz aralashmasi chaqnashi hamda oziq-ovqat mahsulotlaridan zaharlanish, botulizm va qurtirish kasalliklari bilan bog'liq

favqulodda vaziyatlarning oldini olish va yong'in xavfsizligini ta'minlash mavzularida suhbatlar o'tkazildi.

- Oylik doirasida olib borilgan profilaktik tadbirlar davomida hududlarda qanday kamchiliklar aniqlandi?

- Ob-havoning keskin sovuvi, kuz-qish mavsumida olib borilgan profilaktik tadbirlar hamda oylik doirasida o'tkazilgan tekshirish va o'rganishlar davomida mahallalarda, ko'p kvartirali uy-joylarda hamda iqtisodiyot tarmoqlarida tegishli mas'ul rahbarlar tomonidan o'z hududlarida yong'in xavfsizligi talablariga rioya etilmaganligi aniqlandi.

Jumladan, ko'p kvartirali uylarda o'tkazilgan tekshiruvlar xizmat ko'rsatish ishlarini olib borgan mas'uliyati cheklangan jamiyatlar tomonidan o'zlariga birkirtilgan ko'p kvartirali uy-joylarda texnik va yong'in xavfsizligi talablariga rioya etilmaganligi ma'lum bo'ldi.

Viloyatda aholi yashash punktlarida yong'in o'chirishga mo'ljallangan 2330 ta yong'in-ga qarshi suv havzalari mavjud bo'lib, bugungi kunda 290 tasi nosoz va 768 tasi suv bilan to'ldirilmagan kuzatildi, 1372 ta yer osti suvi (gidrant) olgichlardan 240 tasi nosoz holatda.

Samarqand davlat tibbiyot universiteti, O'zbekiston-Finlandiya pedagogika instituti, Samarqand davlat chet tillar instituti, Samarqand davlat universiteti, Samarqand davlat arxitektura va qurilish universiteti hamda Samarqand davlat iqtisodiyot va servis institutiga qarashli yotoqxonalarda yong'in xavfsizligi qoidalariga rioya etilmagan va binolarda o'rnatilgan yong'in signalizatsiyalari, evakuatsiyani boshqarish tizimlari nosoz holatda va binolarda rejali-ogohlantiruv ta'mirlash ishlari olib borilmagan.

Fazliddin RO'ZIBOYEV suhbatlashdi.

P.S: "Oldini olish". Bu jumla Vazirlar Mahkamasining "O'zbekiston Respublikasi favqulodda vaziyatlarning oldini olish va bunday vaziyatlarda harakat qilish davlat tizimi faoliyatini samarali tashkil etish chora-tadbirlari to'g'risida"gi qarorida 60 marta qo'llanilgan. Demak, favqulodda vaziyatning oqibatini bartaraf etishdan ko'ra, uning oldini olish birlamchi masala. Mazkur masalada mas'ul boshqarmaga rasmiy murojaat bilan chiqib, ayrim savollarimizga javob oloilmadi.

Xususan, "Yil boshidan buyon viloyatda qancha yong'in sodir bo'lgani, is gazidan zaharlanish kuzatildimi-yo'qmi?" degan savolimiz javob xatida ochiq qoldirilgan. Yana savol tug'iladi, statistik raqamlar ochiq qoldirilgan. Tabiiy hamda texnologiyalar xususiyatli favqulodda vaziyatlarning oldi qay tariqa olinadi?

Aytmoqchi bo'lganimiz, statistika ochiq qoldirilgan, jamoatchilik yanada sergak va hushyor bo'lmaydimi? Axir butun dunyoda odamlarga ma'lumot berish orqali muammoning oldi olinadi-ku!

Fiziklar maktabini yaratgan olim

Kvant elektronikasining asoschilaridan biri, Nobel mukofoti sohibi Nikolay Gennadiyevich Basov umrini buyuk kashfiyotlarga bag'ishlagan insonlardan. Bu yil butun dunyoda olim tavalludining 101 yilligi keng nishonlanmoqda.

Nikolay Basov 1922-yilda Rossiya federatsiyasi Lipetsk viloyatining Usmoni shahrida tavallud topdi. Uning otasi Gennadiy Basov Voronej o'rmon xo'jaligi texnikasi institutida professor bo'lib ishlagan.

N.Basov besh yoshgacha Usmoni shahrida yashadi. 1927-yil oxirida Basovlar oilasi Voronejga ko'chib kelishdi va bo'lajak olim u yerda o'rta maktabni bitirdi. Shunga qaramasdan, Basovlar oilasi Usmoni shahriga tez-tez borib turardi. U yerda otasining singlisi 2-o'rta maktabning fizika o'qituvchisi Taisiya Fyodorovna ham yashar edi. Kichik Kolya har yili yozda ammasining uyida ta'tilni o'tkazar, ba'zan esa qishki ta'tilda ham u yerda qolar edi. "Mening matematika va fizika bo'lgan qiziqishimda ammam Taisiya Fyodorovnanan bir umr minnatdorman. U mening aniq fanlarni tushunishimga muhabbat uyg'otdi", degan edi Nikolay Gennadiyevich.

1946-yilda Moskva mexanika instituti (hozirgi Moskva muhandislik va injenering instituti)da, 1948-yildan P.N.Lebedev nomidagi fizika institutining tebranishlar laboratoriyasida ishlay boshladi. Institutni tugatgandan so'ng Fizika institutida kichik, katta ilmiy xodim, direktor o'rinbosari, 1973-1988-yillarda shu institutning direktori sifatida faoliyat olib bordi.

N.Basov 1953-yilda nomzodlik, 1956-yilda esa doktorlik ishini himoya qildi. 1954-yilda ustoz A.M.Proxorov bilan molekulyar generatorni yaratdi. Lazerning kashf etilishi fizika fanining ulkan yutug'i hisoblanadi. Chunki bu ixtironing fan va texnikada qo'llanishi cheksiz imkoniyatlar eshigini ochib berdi. 1964-yil 11-dekabr kuni kvant fizikasi asoschilari, buyuk fiziklar Nikolay Basov, Aleksandr Proxorov hamda amerikalik Charlz Tounsga Nobel mukofoti topshirildi.

N.Basovning tashabbusi va bevosita ishtirokida lazer fizikasining amaliy muammolarini o'rganishga qaratilgan bir qator ilmiy tadqiqot institutlari tashkil etildi.

1963-yilda asos solingan Fizika institutining kvant radiofizikasi laboratoriyasi rahbari bo'lish bilan bir vaqtda Moskva muhandislik fizikasi



institutini yarimo'tkazgichlar fizikasi kafedrasini professori bo'lib faoliyat olib bordi. Olim 1962-yildan sobiq SSSR Fanlar akademiyasining muxbir a'zosi, 1966-yilda esa haqiqiy a'zosi etib saylandi. 1967-yildan 1990-yilgacha Nikolay Gennadiyevich "Природа" ("Tabiat") jurnalini tahririyatini boshqardi. 1971-yildan 30 yil mobaynida to'planning, 1974-yildan esa "Kvant fizikasi" jurnalining bosh muharriri bo'ldi.

1962-yilda N.Basov Kseniya Nazarovaga uylandi. Turmush o'rtog'i ham fizik bo'lib, Moskva muhandislik fizikasi institutida ishlagan. Ularning ikki farzandi bo'lib, kichik o'g'li Dmitriy Basov otasi yo'lidan borib, taniqli fizik olim bo'lib yetishdi.

N.Basov fiziklar maktabini yaratdi va bu maktabda buyuk olimlar yetishib chiqayti.

1978-yilda Qrim astrofizikasi observatoriyasi ilmiy xodimlari tomonidan topilgan kichik planeta N.Basovning nomi bilan ataldi. 2000-yil 20-iyunda N.Basov va A.Proxorovga bag'ishlangan pochta markasi chiqarildi.

N.Basov 2001-yilda Moskva shahrida vafot etdi. 2010-yildan boshlab Rossiya Fanlar akademiyasi tomonidan fizika sohasidagi buyuk kashfiyotlar sohiblariga N.Basov nomidagi oltin medal berilmog'ida.

Muhiddin ABDURAHMONOV, O'zbekiston-Finlandiya pedagogika instituti dotsenti. Sanjariddin ZOIROV, assistent.

REKLAMA, E'LOMLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tekzor, samarali va hamyonbop / MUHOJAAT UCHUN TELEFON: 66-233-91-56

SAMARQAND DAVLAT VETERINARIYA MEDITSINASI, CHORVACHILIK VA BIOTEKNOLOGIYALAR UNIVERSITETI quyidagi lavozimlarga tanlov asosida QABUL E'LOMLAR QILADI

KAFEDRA MUDIRLIGIGA:

- biologiya, ekologiya va dorivor o'simliklar kafedrasiga;

- axborot texnologiyalari kafedrasiga;

- o'zbek, rus tillari va adabiyoti kafedrasiga.

KAFEDRA PROFESSORLIGIGA:

- veterinariya jarrohligi va akusherlik kafedrasiga.

KAFEDRA DOTSENTLIGIGA:

- farmakologiya va toksikologiya kafedrasiga;

- xususiy zootexniya kafedrasiga;

- hayvonlar fiziologiyasi, biokimyosi va patologik fiziologiya kafedrasiga;

- hayvonlar anatomiyasi, gistologiya va patologik anatomiya kafedrasiga;

- xorijiy tillar (ingliz tili) kafedrasiga.

KAFEDRA KATTA O'QITUVCHILIGIGA:

- agrotexnologiyalar, ishlab chiqarishni mexanizat-siyalashtirish va avtomatlashtirish kafedrasiga;

- biologiya, ekologiya va dorivor o'simliklar kafedrasiga;

- ijtimoiy gumanitar fanlar, jismoniy madaniyat va sport kafedrasiga (ijtimoiy gumanitar fanlar);

- ijtimoiy gumanitar fanlar, jismoniy madaniyat va sport kafedrasiga (jismoniy madaniyat va sport);

- o'simlikshunoslik va yem-xashak yetishtirish kafedrasiga;

- hayvonlar anatomiyasi, gistologiya va patologik anatomiya kafedrasiga.

KAFEDRA ASSISTENTLIGIGA:

- agrotexnologiyalar, ishlab chiqarishni mexanizat-

siyalashtirish va avtomatlashtirish kafedrasiga;

- veterinariya jarrohligi va akusherlik kafedrasiga;

- veterinariya farmasevtikasi kafedrasiga;

- iqtisodiyot va buxgalteriya hisobi kafedrasiga;

- ichki yuqumsiz kasalliklar kafedrasiga;

- mikrobiologiya, virusologiya va immunologiya kafedrasiga;

- o'simlikshunoslik va yem-xashak yetishtirish kafedrasiga;

- hayvonlar fiziologiyasi, biokimyosi va patologik fiziologiya kafedrasiga;

- hayvonlarni oziqlantirish texnologiyasi va zoogiyena kafedrasiga;

- hayvonlar anatomiyasi, gistologiya va patologik anatomiya kafedrasiga.

KAFEDRA O'QITUVCHILIGIGA:

- axborot texnologiyalari kafedrasiga;

- ijtimoiy gumanitar fanlar, jismoniy madaniyat va sport kafedrasiga;

- tabiiy fanlar (kimyo) kafedrasiga.

Hujjatlar (ariza, shaxsiy varaqa, 2 dona fotosurat, tarjimai hol, olib ma'lumot, ilmiy daraja va unvonlar haqidagi diplomlar nusxalari, oxirgi marta malaka oshirganligi to'g'risidagi hujjat, ilmiy ishlar ro'yxati) ushbu e'lon chop etilgan kundan boshlab bir oy muddat ichida qabul qilinadi.

Murojaat uchun manzil:

Samarqand shahri Mirzo Ulug'bek ko'chasi, 77-uy, xodimlar bo'limi.

Telefon: +99866-234-93-73.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Bahromova Feruza Zoirovna notarial idorasida marhum Axmedjanov Boris Saxibovichga (2021-yil 29-dekabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Bahromova Feruza Zoirovna notarial idorasiga murojaat etishlarini so'raymiz.

Manzil: Samarqand shahri Gagarin ko'chasi, 121-uy.

Samarqand shahrida xususiy amaliyot bilan shug'ullanuvchi notarius Aminov Mashhurjon Yusufovich notarial idorasida marhum Sitxalilova Meva Sultanovnaga (2023-yil 21-aprelda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aminov Mashhurjon Yusufovich notarial idorasiga murojaat etishlarini so'raymiz.

Manzil: Samarqand shahri Sug'diyona maskani, 14/12-uy.

Samarqand shahrida xususiy amaliyot bilan shug'ullanuvchi notarius Tursunov Suhrob Berdiqulovich notarial idorasida marhum Baratov Ismoilga (2022-yil 28-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Tursunov Suhrob Berdiqulovich notarial idorasiga murojaat etishlarini so'raymiz.

Manzil: Samarqand shahri Beruniy ko'chasi, 200-uy, 3-xona.

Samarqand shahrida xususiy amaliyot bilan shug'ullanuvchi nota-

rius Tursunov Suhrob Berdiqulovich notarial idorasida marhum Xasanova Shaxraga (2023-yil 28-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Tursunov Suhrob Berdiqulovich notarial idorasiga murojaat etishlarini so'raymiz.

Manzil: Samarqand shahri Beruniy ko'chasi, 200-uy, 3-xona.

Jomboy tumanida xususiy amaliyot bilan shug'ullanuvchi notarius Mamatqulov Otobek Bolbekovich notarial idorasida marhum Saitmurodov Orzu Bultakovichga (2023-yil 10-iyunda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otobek Bolbekovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Payariq tumanida xususiy amaliyot bilan shug'ullanuvchi notarius Ortiqboyev Aziz Azamatovich notarial idorasida marhum Xazratov Xujamkulga (2023-yil 25-aprelda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ortiqboyev Aziz Azamatovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqloq ko'chasi, 73-uy.

Samarqand tumanida xususiy amaliyot bilan shug'ullanuvchi notarius Normatov Murod To'ychiyevich notarial idorasida marhum Islomova Kibriyoga (2017-yil 11-fev-

ralda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Normatov Murod To'ychiyevich notarial idorasiga murojaat etishlarini so'raymiz.

Manzil: Samarqand tumani Andijoni mahallasi.

Samarqand shahrida xususiy amaliyot bilan shug'ullanuvchi notarius Qodirova Mavluda Turanboyevna notarial idorasida marhum Rajabov Eldor Ergash o'g'liga (2023-yil 16-iyulda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Qodirova Mavluda Turanboyevna notarial idorasiga murojaat etishlarini so'raymiz.

Manzil: Samarqand shahri Farhod ko'chasi, 34-uy.

TOPGANGA MUKOFOTI!

Fuqaro Rashidov Sunnatjon Obid o'g'lining O'zbekiston Respublikasi shaxs guvohnomasi (AD 2867910, 25.03.2023 yilda berilgan) Past Darg'om tumani hududida tushirib qoldirilgan. Ushbu hujjatni topganlardan mukofot evaziga qaytarishlarini so'raymiz.

Telefon: +99888-891-96-97.

Fuqaro Xurramov Jamshidjon Murod o'g'lining harbiy guvohnomasi (QK 3823175, 11.06.2020 yilda berilgan) Nurobod tumani hududida tushirib qoldirilgan. Ushbu hujjatni topganlardan mukofot evaziga qaytarishlarini so'raymiz.

Telefon: +99899-063-33-98.

↓ Qatag'on qurbonlari

TUHMAT GIRDOBIDA

Annaqul Abdullayev 1895-yilda Samarqand shahridagi Qalandarxona mahallasida tug'ilgan. 1917-yil oktabr to'ntarishiga qadar masjid qoshidagi boshlang'ich maktabda, ikki yil madrasada tahsil olgan. Otasi uni rus tilini o'rganishga da'vat qilgach, 3 yil rus-tuzem maktabida o'qiydi. 1918-yildan e'tiboran shaharning ijtimoiy-siyosiy hayotida faol ishtirok eta boshlaydi. Samarqanddagi militsiya maktabini bitirgach, shu sohada xizmat qiladi. Shaharning bir nechta uchastkalarida katta militsioner bo'lib ishlaydi. Bu borada uning savodi va rus tilini bilishi qo'l keldi. Shu sababli uni prokuratura organlariga ishga jalb etishadi. 1924-yilda Samarqand rayon prokurorining yordamchisi vazifasiga tayinlanadi.



Ish davomida tergov jarayonlarini xolis olib borishga intiladi. Turli toifadagi aholini, hunarmandlarni, quloq deb e'lon qilingan shaxslarni noo'rin tazyiqlardan asrashga intiladi. Bunday hollarni uning ustidan yozilgan, tuhmatlardan iborat xatlardan ham bilsa bo'ladi.

Ana shunday tuhmatlar tufayli 1925-1926-yillarda O'zSSR Oliy sudi jinoiy ishlar kollegiyasi uning ustidan jinoiy ish qo'zg'ab, ikki marta sudga tortadi. Bir necha oy davom etgan bunday tekshiruvlar, sudlovlar natijasida barchasi uning ustidan uyushtirilgan tuhmat ekanligi ma'lum bo'ladi va butunlay oqlanib, o'z ishiga qayta tiklanadi.

1927-yil yanvar oyida O'zSSR Adliya xalq komissarligiga uning ustidan yana shikoyat xati tushadi. Shikoyat mualliflari Samarqandning Qalandarxona mahallasilik Miryusuf Miryoqubov va Maxdumi Xorazmiy mahallasidan bo'lgan Mirzo Nodirov edilar. Shuni qiziqi, ilgari yozilgan va Annaqul Abdullayev ustidan O'zSSR Oliy sudida jinoiy ish qo'zg'atilishiga sabab bo'lgan ikkita shikoyat mualliflari ham aynan shu kishilar edi. Lekin negadir bu hol Adliya xalq komissarligidagilarni ham, Oliy suddagilarni ham ajablantirmadi. Aksincha, darhol shikoyatni tekshirish va Abdullayevga nisbatan chora ko'rish, jinoiy

MEN ANGLAGAN HAQIQAT

- * Insonni shakllantirishning minglab yo'li, usullari bo'lishidan qat'i nazar, tarbiya bilan amalga oshadi.
- * **Tarbiya o'zini o'zi idora qilishga, mustaqil fikrlashga, odob va axloq doirasida yashashga, boshqalarga hurmat ko'zi bilan qarashga o'rgatadi.**
- * Yoshlarga tarbiya berayotgan tarbiyachining o'zi tarbiyalangan bo'lishi kerak. Chunki daraxtni uning shirin mevasi bezaganidek, ustozni uning aqli, bilimdon shogirdlari bezaydi.
- * **O'quvchisiga ta'lim berayotgan o'qituvchi haqida xunuk so'z aytgan ota-ona bolasining tarbiyasini buzgan bo'ladi.**
- * Hayotdagi har bir voqea va hodisaga ibrat ko'zi bilan qarashni o'rganing. Bu xislat sizga dunyoni ochadi.
- * **Maqsadi bor odam mehnat qilishni ham bilishi lozim. Mehnatsiz maqsad sarobga o'xshaydi.**



yatning ortidan yuradi. Agar bilim va imkon bo'lmasa, har narsani havas qilaverish bafoydi. Shuning uchun, avval imkon yaratib, keyin orzu qiling.

* **Keksalarning so'zida hikmat bor. Faqat uning mag'zini chaqib, hayotga tatbiq eting.**

* Ajdodlar ildizingiz ekanini unutmang. Shu ildizdan bahra olib, o'sayotgan nihol kelajakda katta daraxtga aylanadi.

* **Odarning yomoni, tarbiyaning eskisi bo'lmaydi. Faqat ularni turlicha tushunib xulosa chiqaramiz, xolos. Bizga yomon tuyulgan odam boshqaga yaxshi bo'lishi ham mumkin.**

* Hayot murakkab. U kimgadir istaklar bog'i, kimgadir kurash maydoni.

* **Inson hayot maktabining bir umrlik o'quvchisi. Chunki u tug'ilgan kunidan boshlab, umrining oxirigacha hayot fani-dan dars olib yashaydi.**

* Baxillik, hasad va ichiqoralik kabi illatlar bor ekan, odamlar orasida o'zaro ziddiyat va kelishmovchiliklar davom etaveradi.

Chori QO'NG'IROV, mehnat faxriysi.



500 YILLIK

Samarqand badiiy ijodkorlar uyushmasi ko'rgazma zalida "Usmoniylar imperiyasida diplomatiya va mehmondorchilik" ko'rgazmasi ochildi.

Ko'rgazma Turkiya Respublikasi tashkil

dan so'ng bu ishni

xalq saylagan

boshqa kishiga top-

shirdim. 1925-yilda men-

ga turarjoy sharoitini inobatga

olib, shahar komunal xo'jaligiga tegishi

xonadonlardan birini berishdi. Keyin bilsam, bu xonadon katta hovlisi bo'lishiga qaramay, Miryoqubov tomonidan egallab olingan ekan. Kommunal xo'jalik ma'muriyati buni bilib qolib, undan uyni bo'shatishini talab qilgan. Oradan bir oy o'tib, aynan shu xonadon menga ajratiladi. "Annaqul Abdullayev xizmat vazifasini suiste'mol qilib bironlarning uyini tortib olgan", deganida u xuddi shu holni nazarda tutyapti.

Bundan tashqari, "mahalla ahli ularning xonadoniga soliqchilar kelganida bir narsani bilib qolishadi. Ular mahalla oqsolomiga to'plab bergan 9 ming so'mlik soliq puli bankka topshirilay, M.Miryoqubov tomonidan o'zlashtirib yuborilgan ekan. Bu voqeani eshitib, uning oldiga bordim va agar qamalib ketishni istamasam, zudlik bilan halqdan olingan pulni joyiga qo'yishi lozimligini aytdim va bu ishni qildirdim ham. Mana shularning hammasi jamlanib uning menga nisbatan g'arazini ro'yi-rost yuzaga chiqardi".

Shu yerda bir masala haqida to'xtalish lozim. Annaqul Abdullayev boshiga shuncha tuhmat toshlari yog'iladi-yu nahotki, uning tarafini oladigan biror-bir kishi topilmagan bo'lsa? Yo'q, topilgan. Ular yosh va haqqo'y prokuratura xodimini qo'llab-quvvatlashgan. Bular, O'zbekiston Kompartiyasi (b) Samarqand okrug komitetining kotibi Rahimiy va okrug ijroiya komitetining raisi Shirinov edi. Ular respublika Adliya xalq komissarligiga murojaat qilib, bu ishni xolisona hal qilishni so'raydi. Ikki yarim yildan buyon goh hibsga olinib, goh qo'yib yuborilib davom etayotgan so'roqlar A.Abdullayevni holdan toydirgandi.

Quyida tergovchi Ginsburgning Samarqand okrug partiya komitetining kotibi yuborgan so'rovnomaga yozgan javobini keltiramiz: **"Partiya a'zosi Abdullayev Annaqulning hozirgi paytda ishsiz ekanligi va uning ishi yuzasidan tergov cho'zilib ketganligi sababli Sizning so'rovnomangizga javoban shuni ma'lum qilamanki, tergov tamom bo'lguniga qadar u rahbarlik bilan bog'liq bo'lmagan oddiy ishlarga tayinlanishi mumkin"**.

1929-yil avgust oyi boshida Gingsburg tergov tugaganini e'lon qildi. U O'zbekiston SSR Oliy sudining Jinoiy ishlar kollegiyasiga yozgan ma'lumotida A.Abdullayev ustidan olib borilgan tergov davomida unga qo'yilgan ayblarning hech qaysi o'z isbotini topmaganligini bildiradi. Va nihoyat, 1929-yil 14-avgustda O'zSSR Oliy sudining Jinoiy ishlar bo'yicha kollegiyasi A.Abdullayevga nisbatan ochilgan 34-raqamli Jinoiy ishni Oliy sud a'zosi Toropkov raisligida ko'rib chiqilib, Jinoiyat-protsessual kodeksining 4-moddasi 5-bandiga asosan, A.Abdullayev harakatlarida jinoiyat alomatlari bo'lmaganligi sababli harakatdan to'xtatiladi.

Shundan keyin Abdullayevning taqdiri qanday kechgan? Hozirgacha hech kim buni bilmaydi. Ehtimol, o'zi xizmat qilayotgan soha xodimlari ham og'ir damlarda yaqqol ko'rinib turgan tuhmat balolaridan uni asrashga harakat qilish o'rniga boshidan mag'zava ag'darish payida bo'lishgani tufayli bu ishdan ko'ngli qolib, boshqa yumushning boshini tutgandir! Balki yaqinlashib kelayotgan katta qatag'on to'fonini his qilib, bunday mudhish jarayonda ishtirok etishni istamagandir... Nima bo'lganda ham biz uning nomini Samarqand viloyati prokuratura organlari xodimlari ro'yxatida boshqa uchratmaymiz.

Xurshid MUSURMONOV, viloyat prokuraturasi bo'lim prokurori. Muzaffar MUQIMOV.

MATBUOT UYI

Zarafshon

САМАРҚАНДСКИЙ ВЕСТНИК

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 16 388 nusxada chop etildi. Buyurtma 672. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da. Bosishga topshirildi: soat 19:00

Navbatchi muharrir: A.SHERXOLOV.

Navbatchi: X.ERNAZAROVA.

Sahifalovchi: B.ABDULLAYEV.

Saytimizga o'tish uchun QR-kodini telefoningiz orqali skaner qiling

ISSN-201667X

9 1772010667009

Sotuvda narxi kelishilgan holda